

太上洞玄靈寶真一勸誡法輪妙經

太上高玄太極三官法師玄一真人說 太上洞玄靈寶真一勸誡法輪妙經 舊文藏於太上六合玄臺 典經皆龍華玉女 金晨玉童 散華燒香 侍衛靈文 依科四萬劫一傳 太上有命 使付太極左仙公也 太極左仙公於天台山靜齋拔罪 燒香懺謝 思真念道 一百日中 神明髣髴 於空玄之上 雲景煒燦 若存若亡 或分或集 曲映齋堂 仙公自覺苦徹遐感天真 於是研思玄業 志勵殊勤 齋未一年 遂致感通上聖垂降 曲盼幽房 以元正之月庚寅日夜 忽有飛雲 丹霄八景玉輿 寶蓋洞曜 流煥太無 燒香散華 浮空而來 千乘萬騎 天真煒燦 不可稱焉 龍飛鸞鳴 鳳翔翩翩 獅子白鶴 嘯歌邕邕 仙童玉女 各數千萬人 手把命魔之節 十絕華旛 結駟鱗騎 蔚鬱靈軒 一時之頃 天真並下 第一自稱 太上玄一第一真人鬱羅翹 第二自稱 太上玄一第二真人光妙音 第三自稱 太上玄一第三真人真定光 三真並集 皆項有圓光 映照十方 悉各坐金狀錦席 左右侍官

太上洞玄靈寶真一勸誡法輪妙經

清微藏書閣

皆把華旛 燔百和名香 擎立空青之案 八色之巾 請 真一勸誡法輪妙經 飛文錦帳 七寶纓絡 玄覆經上 靈真煒燦於絕空之中 於是仙公稽首作禮 天尊妙重 未敢自陳 唯心歡神暢 伏聽戒言

太上玄一真人鬱羅翹告太極左仙公曰

子積劫念行 損身救物 開度有生 惠逮草木

託身林阜 守情忍色 恭禮師宗 存弗厭極

苦志篤厲 乃有至德

致紫蘭臺金闕上清宮有瓊文紫字 功德巍巍 行合上仙 太上命太

極真人徐來勒 保汝為三洞大法師 今復命我來為子作第一度師

子可復坐 我當告子開度法輪勸戒要訣 使子知有宿命 先身罪福

致今之報 於是說之 子將無欲聞之乎 能奉之者 便當靜聽

太上玄一第二真人光妙音告左仙公曰

子轉輪生死 與善結緣 歷劫積稔 代代不休

棄榮委祿 投身幽阜 饑寒臉墟 念道不言

欽仰師寶 恒如對神 仁和心柔 坐起欣欣

長齋苦思 時不虧間 精感遐徹 故名標上清
太上命我為子第二度師 當具告子三塗五苦生死命根勸戒要訣 使
子知魂神苦痛 所從而來 欲聞之不乎 吾當為子說之 子當奉之
焉

太上玄一第三真人真定光告左仙公曰

子七世有惠 割口救窮 仁及鳥獸 福流後代
潤灑子身 子又積勤 躬奉師寶 寒不思裘
饑不爽口 艱苦林岫 注心不替 紫藏納真
項生奇光 致高上曲降 錫加仙卿 以酬昔德
豈不巍巍乎

太上今命我為子第三度師 今當告子無量妙通轉神入定勸戒要訣

子欲宗之不乎 吾當說之 子閉口修之焉 太上玄一真人曰

夫天地建立 元始分判 陰陽開化 五行列位
無上無下 無天無地 無大無小 無色之內
無形之外 皆稟受空洞 以氣為宗 宗生於始
始生於元 元生於玄 三生萬物 莫不相承

太上洞玄靈寶真一勸誡法輪妙經

清微藏書閣

網維八極 致天地長存 眾真高仙

十方已得道四方無極世界塵沙而來真人 從無數劫來 莫不有

師 皆從師奉受上清三洞寶經 而得為高仙上聖 十方導師也 師
者 寶也 為學無師 道則不成 非師不行 非師不生 非師不度

非師不仙 故師 我父也 子不愛師 道則不降 魔壞爾身 八

景龍輿 焉可得馭 太極玉闕 焉可得登 儒教則有三墳五典 八

索九丘 皆以師訓文學之士 尚復承師以致明達 況子今學上清之

道 希求昇騰 永享無量之福乎 慢師行道 求肉飛之舉 謂投之

夜光 失爾一往也 但子積劫勤尚 展轉不倦 功滿德就 瓊文紫

字 列於玄臺 位登太極仙公之任 而三師不備 勸戒未充 於格

未得便登太極之宮也 太上以子宿勳高重 故命我等為子三師 度

子要訣 以成子道 使子速得飛騰三界 遊乎上清 身詣金闕 受

號仙公也 仙公唯唯 伏受誨命 惟願天尊哀而矜愍 今為說之

即奉之焉

太上玄一真人曰 太上真一勸誡法輪妙經 九天有命 皆四萬劫一
出 太上虛皇 昔傳太上大道君 道君傳太微天帝君 天帝君傳後

聖金闕上帝君 令付仙卿仙公仙王已成真人 不傳中仙及五嶽諸仙人也 自無玄名帝圖 錄字三清太極玉文 自非仙公之質 不得參聞 此經高妙 太上所重 藏之六合紫房之內 仙童仙女恒寶祕侍 真有盼其篇目 慶延七祖 死魂生天 福覆一宗 門戶隆盛 世出賢明 修之致雲輿龍駕 白日飛行 輕泄漏慢 謗毀聖文 考罰爾身 罪福報對 明慎之焉

太上玄一真人告仙公曰 吾昔受太上無極大道君 真一勸戒法輪妙經 修行奉師 一日六時燒香 朝禮旋行 皆先朝我師 心存目想 見師如經 我無有師 經則不見 既得見經 師便在前 抱饑忍渴 隨師東西 我受師訓 切勵備經 痛如刀割 剋如毒錐 俛仰伏事 恒不敢虧 痛不敢辭 毒不敢言 如此經歷四億萬年 真道得成 位登太上玄一真人 今復被師命 為子作三度法師 子能如我不 若能如我者 我當為子說經

仙公稽首禮謝 上告太上玄一真人三度法師曰 弟子有幸 得仰對天顏 加以師訓 復教以要言 無量之分 豈微言所陳 自顧稟植因緣 得生法門 少好上道 仰希神仙 長齋幽阜 心想上聖

太上洞玄靈寶真一勸戒法輪妙經

清微藏書閣

不悟天尊 窺盼幽谷 降教真道 自惟闇昧 愧所不勝 然推前自期 誓心三光 躬宗師訓 不敢有虧 彌綸萬劫 情無退轉 尊奉法教 唯師是從 永願哀愍 覺所未悟 啟訓幽深 說法演誠 以見拔贖 伏聽命旨 誓奉之焉

太上洞玄靈寶真一勸戒法輪妙經竟

天運辛卯年酉月正一天師清微弟子洪鼎堅羅大英恭錄彙編

鞠即延複校